

Pervershon Legalisá

Dia 1 di aprel, 2001 tabata un dia históriko. E fecha ei, Hulanda a introdusí matrimonio homoseksual na mundu. For di e dia ei, dos hòmbler òf dos lesbian legalmente por gosa tur e benefisionan di matrimonio: penshon, erensia, belasting, adopshon di yunan, i divorsio. Asta dikshonario hulandes a kambia definishon di matrimonio, eliminando e parti ku ún hòmbler i ún muhé ta forma matrimonio. Algun tempu despues, Bèlgika a sigui e ehèmpel bergonsoso di nos pais madre.

Dos siman pasá, korte superior di Ontario, un provinsia di Canada, a dikta sentensia ku homoseksualnan tin e derechu legal pa kasa na nan pais. I siman pasá—17 yüni—promé minister di Canada, Jean Chretien, a duna di konosé ku su gobièrnu lo no apelá sentensia di hues, pèrmitiendo matrimonio homoseksual.

Mas nashon ta pensa di legalisá matrimonio homoseksual. Maske nos ta forma parti di reino hulandes, te ainda nos gobernantenan a evitá di legalis'è na nos islanan. Ma sin duda nan lo (ta) haña preshon pa ahustá nos leinan na esnan hulandes.

I indudabelmente nos lo haña preshon for di aktivistanan homoseksual i lèsbian. Nan ta inkansabel predikando toleransia pa nan sistema di bida. Ma ripitidamente a wòrdu probá ku nan tin niun klase di toleransia pa esnan ku perspektiva kontrali di nan mentalidat pèrvertí.

Nos tin ku wak bon kiko nos ta hasi! **Nos NUNKA mester laga otronan preshoná nos pa aseptá algu kontrario di e mandamentunan di nos Kreador!**

Ta na su lugá pa protehá derechunan humano a base di koló i sekso. Eseinan ta kos ningun di nos por skohe. Kada persona tambe mester tin e libertat pa skohe e religion ku e mes ke. Ma awendia hopi hende ke inventá un derechu nobo: preferensia seksual. **I esei nos no por aseptá!**

Iresepkto di tur nan esfuersonan pa indoktriná nos ku nan no por yuda ku nan ta homoseksual, tin ningun evidensia ku esei ta e kaso. Tantu biaha, na bos haltu nan a proklamá ku awor si siensia a proba ku homoseksualidat tin un origen biológiko. Ma ora e supuesto “evidensia” ta evaluá dor di sientífikonan imparisial, e “prueba” ei tambe a kai na awa.

En kontraste, e evidensia ta muestra ku e preferensia erótiko pa un persona di e mesun sekso ta **komportashon siñá!** Bèrdat, por tin faktor ku ta enkurashá un persona den e direkshon homoseksual òf lèsbian. Ma e persona no ta obligá pa praktiká su aktonan immoral i grosero ku un otro persona di su mesun sekso.

Ademas, **tin amplio ehèmpel di hende ku tabata homoseksual ku a kibra ku e sistema ei di bida.** Nan a siña pensa na un manera heteroseksual, a kasa (ku un persona di sekso opuesto), a haña yu di nan mes, i tin un bon matrimonio.

Tur esaki ta harmonisá ku instrukshon di nos Kreador. Dios ta laga sa bon kla ku homoseksualidat ta piká...algu malu ku hende mes ta skohe pa hasi. Beibel ta informá nos ku e piká aki ta un otro resultado di bandoná Dios, preferando di sigui nos mes mal deseonan. “..Dios a entregá nan na pashonnan bèrgonsoso, pasobra nan muhénan a kambia nan funshon natural pa loke ta kontra naturalesa, i di e mesun manera tambe e hòmbrenan a bandoná e funshon natural di muhé i a kima den nan pashon un pa otro; hòmbler ku hòmbler ta kometé aktonan indesente i ta risibí den nan mes persona e kastigu meresí pa nan eror” (Romanonan 1:26-27).

Hulanda, Bèlgika i Canada por ta konosí komo nashonnan atvansá. Ta parse ku nan ta atvansá sigur den immoralidat i piká! Si nos ke Dios Su bendishon riba nos pais, nos tin ku tene duru na e normanan di nos Kreador. I spesifikamente na nos islanan nos no mester aseptá pervershon legalisá.